



Geschichte der geistlichen Stiftungen, der adlichen Familien, so wie der Städte und Burgen der Mark Brandenburg

[Urkunden-Sammlung für die Orts- und spezielle Landesgeschichte]

Riedel, Adolph Friedrich

Berlin, 1842

XVI. Markgraf Johann Georg verleiht dem Landeshauptmann Conrad von Rohr das Angefälle der Güter, die Levin von Bülow von der Stiftskirche zu Havelberg zu Lehn trug, im Jahre 1555.

Nutzungsbedingungen

[urn:nbn:de:hbz:466:1-54306](https://nbn-resolving.org/urn:nbn:de:hbz:466:1-54306)

XVI. Markgraf Johann Georg verleiht dem Landeshauptmann Conrad von Rohr das Angefälle der Güter, die Levin von Bülow von der Stiftskirche zu Havelberg zu Lehn trug, im Jahre 1555.

Wir Johan Georg, von Gottes gnaden Marggraff zw Brandenburgk, zw Stettin, Pommern, der Cassuben, Wenden, Ihn Schlesiens, zw Croffen hertzog, Burggraff zw Nurenberg vnd furst zw Rugen, Bekennen vnd thun kundt hiemit vor vnfs, vnser Erben vnd sunsten vor allermenniglich. Nachdem der Ernuhest vnser lieber getrewer Curdt Rhor, Hauptman der Prignitz vnd Landes zw Ruppin, der weiniger zcall Ihm funfzigsten Jare vorgangen, vff alle vnd Jede lehnguetter, So Leuin von Bulow von diesem stifte havelberg zw lhene tregt vnd zum teil von Philip Duficken, hanfen Trebbowen vnd henningk Biren hieruor erlangt, von vnserm gnedigen vnd freuntlichen liebsten hern vnd vatern dem Churfürsten zw Brandenburgk, vff mitbewilligung vnser freuntlichen lieben Broders hern Friderichs Ertzbischoffs zw Magdeburgk vnd halberstadt etc. vnd Marggrafens zw Brandenburg etc., die Zeit erwelten Bischoffs zw havelberg, vnd Ihmgeleichen des Capittels daselbst Consens, zw Rechten angefel erhalten, Wie ehr vnns dan deshalben vrsigelte Brieff vnd vorschreibung furgelegt, Als hat ehr vnfs, nachdem nach abgang gedachtes vnser lieben Broders, Marggraff Friderichs seligen, vnser liebster Shon Marggraff Joachim Friderich, widerumb zum Bischoffe dieses stifts zw havelberg postulirt worden, Midth vnderthenigen fleifs angelangt, Ime vnd seinen Erben zw gnaden solche habende angefels vorschreibung vor vnfs auch ahn itat vnd von wegen gedachts vnsern lieben Shons zw bewilligen, zu uornen vnd zu bestettigen, Welchs wir dan, in ansehung vnd betrachtung williger vnd angenemer dienste, So ehr vnsern liebsten hern vnd vatern hochgedacht, vnfs vnd diesem stifte bishero vilfeldig gethan vnd nochmals zw thuende erbittig ist, mitt allen gnaden geruhett vnd Ime vnd seinen Menlichen leibs lehens Erben doruff vnd aufs sondern gnaden, damit wir Ime geneigt sein, vor vns vnd ahn stadt Auch auff midtbewilligung vnsern lieben Shons obgemeldt, Als postulirten Bischoffs zw havelberg, dieselbigen lehnguetter alle vnd Insonderheit, wie die gemelter Leuin von Bülow Itzo von diesem stifte zw lhene tregt, vnd zum teil wie obthet von Philip Dufeken, hanfen Trebbowen vnd henningk Biren erlanget, Als nemlich im dorff Wutke Zehen hofe vier Cossäten midth zwanzich huffen landes, dauon 20 winspel allerley Korn. Item das vierde teil ahn Schultzengericht zw Wutke, 4 morgen Landes vff dem velde daselbst, etliche worde vor dem dorffe; Item eine wische vor dem Tamme, den sinhalen zehett, vnd seinen wonhoff im dorffe; Item henningk Biren seligen nachgelassene lehnguetter, Als das vierde teil an wusthen Barentin midt allen Gerechtigkeiten, Schultzengerichte vnd kirchen lehenn; Item 7 Winspel allerley korn im dorffe Wutke, 3 Hofe zween Cossäten, haben semplich 9 hofen landes; Item 9 morgen vnd etliche stücken Landes die krummen stücken genant vor wutke; Item ein stücke Landes (genant die halbe hufe), zwo worde vnd einen teich bey der Mollen; Item hans Trebbowes seligen hinderlassen lehnguetter, Als einen wonhoff im dorffe Czatzke mit 5 hufen Sampt andern freien kempenn vnd zugehorenden Eckern vnd wischen, Item 14 hufen vff dem felde daselbst, 7 hufener geben von berurten hufen 5 schock funffe halben vnd Zwanzich schillinge stendalische, mitt dinsten, Rochhunnern vnd allen andern gerechtigkeiten. Item zween Cossäten geben 16 schillinge stendalische mitt dinsten, Rochhunnern vnd allen andern gerechtigkeiten; Item die Mülle daselbst mit aller Gerechtigkeit; Item 16 hufen zw folckwige vnd 2 hufen zw verchow, das strafengerichte vnd kirchenlhen Im dorffe Czatzke; Item Michael Tobbers vorlassen lehnguetter, als zween hofe im dorffe Wutke, darzw 4 hufen vnd einen Cossätenhoff, den ehr selbst be-

wonet hatt vnd etzlige wurde darzu gelegen, welche lhenguetter alle von alters hero von obbemeltem stifte havelberg zw lhene gegangen, zw Rechtem angefelle gnediglich vorschriben vnd zugefagt haben, Vorschriben vnd zuzagen hiemit obgemelten vnfern lieben getrewen Curdt Rhoren vnd seinen menlichen leibs lehens Erben solche obgedachte Lhenguther zw rechtem angefelle In Crafft vnd macht ditz briefs vnd also, wo sich zutrüge, das obgenanter Leuin von Bülow ohne menliche leibs lehens Erben vorsterben wurde, das alsdan vilgedachter Curdt Rhore oder seine menliche leibs lehens Erbenn dieselben obgeschriben Lehenguetter alle hinfurter zw Rechtem Manlehen haben, besitzen vnd zw Jeder zeit von gedachten stift havelberg nhemen vnd empfangen sollen, wie solcher lehen art vnd gewonheit ist. Vnd im falle ob sich in zukunfftigen Zeitten weiter zutragen wurde, das vnser freuntlicher lieber Shon Marggraff Joachim Friderich, Itzt erwelter Bischoff zw havelberg, solch Bischoffthumb zw Havelberg eigener Person nicht besitzen vnd dasselbige also widerumb abtretten vnd einen andern vorlassen wurde, So soll doch vilgemelten Curdt Rhorn vnd seinen menlichen leibs lhens Erben solch obgeschriben lhenguter zw rechten Angefelle vorschriben sein vnd bleiben, Darbey wir sie zw Jeder Zeit gnediglich schutzen vnd handthaben wollen. Wir wollen auch oberurten Curdt Rhorn Ahn das Capittell zw havelberg derwegen vmb Ire bewilligung gnediglich vorschriben des vorsehns, weil sie hieuor darinne Auch albereit consentirt, Sie werden sich in deme vff vnser gnedigs ansuchen nochmals guetwillig ertzeigen. Zu urkunt mit vnserm anhangenden Damm Secret vorfigelt vnd gegeben auffm Schlos Szeccellin, Sontags Octauas Trium Regum, Nach Christi vnfers lieben hern geburt der weiniger Zcall Ihm funff und funffzichsten Jare etc.

Nach dem Havelbergischen alten Lehnbuche.